



REPUBLIKA E SHQIPËRISË
AUTORITETI I KONKURENCËS
KOMISIONI KONKURENCËS

Nr. 232/prot.
18

Tiranë, më 11.07.2024

VENDIM

Nr. 1097, Datë 11.07.2024

“PËR VENDOSJE GJOBE NDAJ SHOQËRIVE GR ALBANIA SHPK, AGNA SHA dhe GJOKA KONSTRUKSION SHA, PËR MOS NJOFTIMIN BRENDA AFATIT TË PËRQENDRIMIT TË REALIZUAR NËPËRMJET SHITBLERJES SË 34% TË KAPITALIT TË SHOQËRISË GRABOVA HYDROPOWER SHPK NGA SHOQËRIA GJOKA KONSTRUKSION SHA”

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Rezana KONOMI	Anëtar
Z.	Durim Kraja	Anëtar
Znj.	Fatjola DELIJA	Anëtar

Në mbledhjen e tij të datës 11.07.2024, shqyrtoi çështjen me:

Objekti: Shqyrtimi i sjelljes së ortakëve të shoqërisë GRABOVA HYDROPOWER SHPK, për mos njoftimin brenda afatit të përqendrimit të realizuar nëpërmjet shitblerjes së 34% të kapitalit të shoqërisë GRABOVA HYDROPOWER SHPK nga shoqëria GJOKA KONSTRUKSION SHA.

Baza Ligjore: Nenet 2, 10-12, neni 24, germa d, nenet 53, nenet 73 dhe 75 të ligjit nr. 9121, datë 28.07.2003 “Për mbrojtjen e konkurrencës”.

Komisioni i Konkurrencës, pas shqyrtimit të relacionit të Sekretarit të Përgjithshëm, si dhe raportit të Drejtorisë së Analizës dhe Metodologjisë së Tregjeve mbi njoftimin e përqendrimit të realizuar nëpërmjet krijimit të një ndërmarrje të përbashkët me funksione të plota, GRABOVA HYDROPOWER SHPK, nga shoqëritë GR ALBANIA SHPK, AGNA SHA dhe ALB - STAR SHPK dhe shitja e 34% të kuotave të shoqërisë GRABOVA HYDROPOWER SHPK të zotëruara nga shoqëria ALB-STAR SHPK tek shoqëria GJOKA KONSTRUKSION SHA.

VËREN SE :

I. Procedura

Autoriteti i Konkurrencës, nëpërmjet shkresës nr. 232 prot. i AK, datë 12.03.2024 “Kërkesë për informacion”, dërguar nga një media televizive, është njoftuar mbi transaksionin e shitjes së kuotave të shoqërisë ALB-STAR SHPK tek shoqëria GJOKA KONSTRUKSION SHA.

Me vendimin nr. 1075, datë 26.04.2024 “Mbi fillimin e procedurave të kontrollit të përqendrimeve për rastin e krijimit të ndërmarrjes së përbashkët, GRABOVA HYDROPOWER SHPK, nga ortakët themelues të saj, shoqëritë GR ALBANIA SHPK, AGNA SHA dhe ALB-STAR SHPK, si dhe transaksionin e shitjes së kuotave të shoqërisë ALB-STAR SHPK tek shoqëria GJOKA KONSTRUKSION SHA, Komisioni i Konkurrencës vendosi: 1. Fillimin e procedurës së kontrollit të përqendrimeve mbi rastin e krijimit të ndërmarrjes së përbashkët GRABOVA HYDROPOWER SHPK nga ortakët themelues të saj, shoqëria GR ALBANIA SHPK, shoqëria AGNA SHA dhe shoqëria ALB-STAR SHPK dhe 2. Fillimin e procedurës së kontrollit të përqendrimeve mbi transaksionin e shitjes së kuotave të shoqërisë ALB-STAR SHPK tek shoqëria GJOKA KONSTRUKSION SHA.

Në zbatim të vendimit të Komisionit të Konkurrencës, me shkresën nr. 232/10 prot., datë 03.06.2024 “Formulari i thjeshtuar i njoftimit të përqendrimit”, shoqëria GRABOVA HIDROPOWER SHPK, dorëzoi dokumentacionin e parashikuar në rregulloren “Për zbatimin e procedurave të përqendrimit të ndërmarrjeve” dhe Sekretariati filloi procedurat e kontrollit të përqendrimeve.

Referuar dokumentacionit të depozituar rezultoi se më datë 05 prill 2021, ndërmjet shoqërive GJOKA KONSTRUKSION SHA (blerësi) dhe ALB – STAR SHPK (shitësi) është nënshkruar “Kontratë Shitblerje Kuote”.


Shitësi është ortak i shoqërisë GRABOVA HYDROPOWER SHPK dhe zotërues i 1 (një) kuote, që i korrespondon 34% të kapitalit të saj.

Shitësi dhe njëherazi ortak i shoqërisë, i ka shitur blerësit kuotën që ai zotëron në shoqërinë GRABOVA HYDROPOWER SHPK, përkundrejt çmimit të shitjes.

Ministria e Infrastrukturës dhe Energjisë (Autoriteti Kontraktues) ka miratuar transferimin e 34% të kuotave të kapitalit themeltar të shoqërisë koncesionare “Grabova Hydropower” SHPK të zotëruara nga shoqëria ALB - STAR SHPK në favor të shoqërisë GJOKA KONSTRUKSION SHA, me kushtin që të ruhet emri i shoqërisë koncesionare GRABOVA HYDROPOWER SHPK, si dhe të mbarten të gjitha të drejtat dhe detyrimet e përcaktuara në Kontratën e Koncesionit të formës BOT, për ndërtimin e hidrocentralit “Grabovë 1” të ndryshuar, pasi në të kundërt transferimi i pjesëve të kapitalit është i pavlefshëm.

Në përfundim të transaksionit, shoqëria GRABOVA HYDROPOWER SHPK zotërohet nga GR ALBANIA SHPK %, AGNA SHA % dhe GJOKA KONSTRUKSION SHA %.

Referuar dokumentacionit të depozituar, transaksioni i propozuar përbën një përqendrim në kuptim të nenit 10 dhe 12 të ligjit nr. 9121 datë 28.07.2003 “Për mbrojtjen e konkurrencës” dhe Udhëzimit “Mbi kontrollin e përqendrimeve ndërmjet ndërmarrjeve”, i cili është objekt autorizimi nga Komisioni i Konkurrencës.



II. Njoftimi i përqendrimit në shkelje të afatit ligjor

Bazuar në nenin 12, pika 2 të ligjit nr. 9121, datë 28.07.2003 “Për mbrojtjen e konkurrencës”, një përqendrim duhet të njoftohet pranë Autoritetit të Konkurrencës brenda 30 ditëve nga lidhja e marrëveshjes.

Sipas parashikimit të nenit 53 të ligjit, kanë detyrimin për njoftim: a) ndërmarrjet pjesëmarrëse në bashkim; b) ndërmarrjet që marrin nën kontroll të gjithë ose pjesë të një ose më shumë ndërmarrjeve të tjera; c) në rast krijimi të një ndërmarrjeje të përbashkët, sipas pikës 3 të nenit 10, ndërmarrjet që kanë kontrollin e ndërmarrjes së përbashkët.

Referuar Udhëzimit “Mbi kontrollin e përqendrimeve ndërmjet ndërmarrjeve”, në pikën 130 citohet se: Të gjitha përfitimet e kontrollit të përbashkët duhet të njoftohen në mënyrë të përbashkët nga ndërmarrjet përfutuese të këtij kontrolli, aksionarët e rinj dhe ekzistues. Në rastin e blerjes së 34% të kuotave të shoqërisë GRABOVA HYDROPOWER SHPK nga shoqëria GJOKA KONSTRUKSION SHA, ortakët e shoqërisë duhet të njoftojnë bashkërisht përqendrimet që shkaktojnë këto ndryshime të situatave të kontrollit të përbashkët.

Në zbatim të nenit 53 të ligjit dhe Udhëzimit “Mbi kontrollin e përqendrimeve ndërmjet ndërmarrjeve” kanë patur detyrimin për njoftim shoqëritë GJOKA KONSTRUKSION SHA, AGNA SHA dhe GR ALBANIA SHPK.

Më datë 05 prill 2021, ndërmjet shoqërive GJOKA KONSTRUKSION SHA (blerësi) dhe ALB – STAR SHPK (shitësi) është nënshkruar “Kontratë Shitblerje Kuote” dhe në zbatim të nenit 12, pika 2 e ligjit, palët kanë patur detyrimin për njoftim sipas parashikimit të nenit 53 të ligjit, brenda 30 ditëve duke filluar nga data 05.04.2021.


Për mos respektim të afatit të përcaktuar, bazuar në nenin 73, pika 1, germa dh) e ligjit nr. 9121, datë 28.07.2003 “Për mbrojtjen e konkurrencës”, Komisioni i Konkurrencës vendos gjobë në masën jo më shumë se 1% të xhiros totale të vitit paraardhës financiar, mbi ndërmarrjet apo grupimet e ndërmarrjeve nëse nuk njoftojnë një përqendrim, sipas neneve 10 dhe 12 të këtij Ligji.

Neni 18 i ligjit nr.10 279, datë 20.5.2010 “Për kundërvajtjet administrative”, specifikon se: organi që shqyrton kundërvajtjen administrative duhet të marrë parasysh: a) rrethanat e kryerjes së kundërvajtjes; b) nëse kundërvajtësi rezulton i dënuar administrativisht edhe më parë; c) rëndësinë e kundërvajtjes; ç) pasojat që kanë ardhur nga veprimi apo mosveprimi.

Për të vlerësuar rëndësinë/gravitetin e shkeljen Komisioni i Konkurrencës ka marrë në konsideratë faktorët e mëposhtëm:

- Njoftimi është bërë me iniciativën e Autoritetit të Konkurrencës,
- Procedura është kryer pasi ka kaluar 6 muaj nga parashikimi i nenit 12, pika 2 e ligjit,
- Përqendrimi vlerësohet si përqendrim horizontal,

Mbështetur në konkluzionet e vlerësimit të konkurrencës në treg pas përqendrimit është konstatuar se transaksioni i realizuar nuk ka impakt në konkurrencën në treg, pasi ndërmarrja e përbashkët, GRABOVA HYDROPOWER SHPK ende nuk ka përfunduar projektin e ndërtimit të



hidrocentralit dhe nuk është aktive në tregun përkatës të produktit, dhe për pasojë mos njoftimi nuk ka sjellë prishje të konkurrencës në treg.

Referuar nenit 15 të ligjit nr. 9121/2003, rezulton se xhiroja e shoqërive palë në marrëveshje është në vlerën rreth 21.6 miliard lekë.

PËR KËTO ARSYE:

Komisioni i Konkurrencës, në bazë të nenit 24, shkronja d dhe neni 73, pika 1, germa dh) të ligjit nr. 9121, datë 28.07.2003 “Për mbrojtjen e konkurrencës”,

VENDOSI:

1. Për mos njoftimin brenda afatit të përqendrimit të realizuar nëpërmjet shitblerjes së 34% të kapitalit të shoqërisë GRABOVA HYDROPOWER SHPK nga shoqëria GJOKA KONSTRUKSION SHA, vendosjen e gjobës mbi:
 - a) shoqërinë AGNA SHA, në masën
 - b) shoqërinë GR ALBANIA SHPK, në masën
 - c) shoqërinë GJOKA KONSTRUKSION SHPK, në masën lekë,
2. Kundër këtij vendimi mund të bëhet ankim pranë Gjykatës Administrative Tirane, brenda 30 ditëve nga data e marrjes së njoftimit të vendimit.
3. Ngarkohet Sekretariati për njoftimin e palëve.

Ky vendim hyn në fuqi menjëherë.

KOMISIONI I KONKURRENCËS

Leida MATJA

Zv/Kryetar

Rezana KONOMI

Anëtar

Durim KRAJA

Anëtar

Fatjola DELIJA

Anëtar

Denar BIBA

Kryetar

